

乾隆杭州府志

杭州府志卷八十三

人物二 忠臣一

三國吳

凌操餘杭人統父輕俠有膽氣孫策初興每從征伐常冠軍履鋒守永平長平治山越姦猾歛手遷破賊校尉及權統軍從討江夏入夏口先登破其前鋒輕舟獨進中流矢死權以操死國事拜統別部司馬攝父兵

三國志  
凌統傳

徐琨富春人孫堅之甥少仕州郡漢末擾亂去吏隨堅征伐有功拜偏將軍堅薨隨孫策討樊能于麋等於橫江擊張英於當利口破英擊走笮融劉繇事定策表琨領丹楊

太守會吳景委廣陵來東復爲丹楊守琨以督軍中郎將  
領兵從破廬江太守李術封廣德侯遷平虜將軍後從討  
黃祖中流矢卒子矯嗣侯討平山越拜偏將軍卒弟祚襲  
封亦以戰功至蕪湖督平魏將軍

三國志吳主  
權徐夫人傳

南北朝

卜天與餘杭人善射宋文帝元嘉中爲廣威將軍領左細  
仗元克劭事變倉卒舊將羅訓徐牢皆望風屈附天與不  
暇披甲執刀持弓疾呼左右出戰徐牢曰殿下入汝欲何  
爲天與罵曰只汝是賊手射劭于東堂幾中逆徒擊之臂  
斷倒地乃見殺孝武帝位贈龍驤將軍益州刺史謚壯侯

給天與家長廩子伯宗殿中將軍明帝泰始初領幢擊南

賊于赭圻戰沒

南史本傳

杜文謙吳郡錢塘人齊廢帝爲南郡王文謙侍五經文句  
歷太學博士出爲溧陽令未之職會明帝知權蕭詵用事  
文謙乃謂綦母珍之曰天下事可知灰盡粉滅匪朝伊夕  
不早爲計吾徒無類矣珍之曰計將安出答曰先帝故人  
多見擯斥今召而使之誰不慷慨近聞王洪軌與趙越常  
徐僧亮萬靈會共語皆攘袂搥床君其密報周奉叔使萬  
靈會魏僧勔殺蕭詵則宮內之兵皆我用也卽勒兵入尚  
書斬蕭令兩都伯力耳其次則遣荆卿豫讓之徒因諮事

左手頓其胸則方寸之刃足以立事亦萬世一時也今舉大事亦死不舉事亦死死等耳死社稷可乎若遲疑不斷復少日錄君稱勅賜死父母爲殉在眼中矣珍之不能用事敗使卽往蔣王廟祈福因收送廷尉與周奉叔杜文謙同死文謙有學行善言吐其父聞其死曰吾所以憂者恐其不得死地耳今以忠義死復何恨哉王經母所以欣經之義也時人美其言

南史茹法亮傳

按舊志有許善心傳浙江通志亦載之邵本據隋書本傳善心北高陽新城人駁正而刪之是矣後來改本仍載入忠臣皆疎於考證也通志以隋書地里志高陽隸

河間郡無新城縣遂據舊志引舊唐書許敬宗傳定爲  
杭之新城今考隋書地理志河間郡統縣十三一曰高  
陽注云舊置高陽郡大業初入縣一曰清苑注云舊曰  
樂鄉後齊省樊與北新城等入永寧開皇初改清苑据  
此則高陽未改縣時原有所統而北新城隸焉通志遽  
謂無新城縣殆由未及闕注豈可引爲定論乎改本又  
云許氏宗譜謂六朝時高陽許皈避亂移家鹽官傳十  
世至善心爲隋禮部尚書因官北地復歸高陽其子爲  
敬宗敬宗子適歸隱鹽官東審山則善心寧不得爲杭  
人乎况高陽旣無新城則正史新城之說安非因居杭

而傳聞致誤茲忠臣仍列善心亦疑以傳疑之義以上  
皆改本之說也北地無高陽之誤已辨正於前矣修志  
者欲據私家之譜以爲憑其說本無庸致辨今姑就其  
譜考之善心祖懋父亨正史俱明著爲高陽新城人譜  
乃云善心因官北地復歸高陽似未知善心祖父俱正  
史有傳其不足信者一也六朝促運乃云販至善心已  
傳十世其不足信者二也此豈可與正史相詰難哉

唐

褚遂良字登善亮之子授秦王府鎧曹參軍貞觀中累遷  
起居郎諫罷封禪遷諫議大夫兼知起居事帝曰朕有不

善卿必記耶對曰守道不如守官臣職載筆君舉必書時  
魏王泰禮秩如嫡羣臣未敢諫帝從容訪左右曰方今何  
事尤急遂良曰今四方仰德誰弗率者惟太子諸王宜有  
定分帝爲改容太子承乾廢用遂良言定策立晉王爲皇  
太子授遂良太子賓客帝欲自討遼東遂良固勸無行進  
黃門侍郎參綜朝政帝寢疾召遂良長孫無忌曰漢武帝  
寄霍光劉備托諸葛亮朕今委卿矣謂太子曰無忌遂良  
在而無憂因命遂良草詔高宗卽位封河南郡公兼太子  
賓客進尚書右僕射帝將立武昭儀遂良等入或謂無忌  
當先諫遂良曰太尉國元舅有不如意使上有棄親之譏



吾奉遺詔若不盡愚無以下見先帝旣入帝曰罪莫大于  
絕嗣皇后無子今欲立昭儀謂何遂良曰皇后本名家奉  
事先帝先帝疾執陛下手語臣曰我兒與婦今付卿且德  
音在陛下耳可遽忘之皇后無他過不可廢帝不悅翌日  
復言對曰陛下必欲改立后者請更擇貴姓昭儀昔事先  
帝身接帷第今立之奈天下耳目何遂良因致笏殿階叩  
頭流血曰還陛下笏丐歸田里帝大怒命引出武氏從幄  
後呼曰何不撲殺此獠無忌曰遂良受顧命有罪不加刑  
武氏立乃左遷遂良潭州都督顯慶二年徙桂州未幾貶  
愛州刺史歲餘卒年六十三神龍中復官得德宗追贈太

尉唐書  
本傳

按舊志有顏直卿傳邵本刪去之其案云唐書本傳直卿師古五世從孫師古傳其先瑯琊人祖之推居關中爲京兆萬年人令狐垣志銘公祖昭甫晉曹二王侍讀贈華州刺史父惟貞薛王友贈太子少保直卿自書家廟碑亦然而萬歷志乃云祖昌任鹽官州判卒於官父必寧占籍鹽官名與官俱誤其不足爲據明矣詳其致誤之由皆因海寧州有雙仁廟而加之傳會也改本仍列直卿於忠臣併載原案語而綴其下云疑以傳疑史書之例況立廟崇祀尤當思有舉莫敢廢之意焉茲沿

舊志錄之亦以見忠臣節士後人皆爭引爲鄉里榮云爾夫鄉里有忠臣節士誠足爲榮本非鄉里之人而誤引之亦可以爲榮乎杭州人物林立忠臣節士彪炳千秋原不必借才異地以爲重如以爲廟祀不可廢則其廟誠不可廢也而其人實非杭人以杭州有廟爲卽杭人則先賢有廟在杭者若范文正王文成亦將俱以爲杭人乎因襲舛誤不可自附於傳疑之例也

許遠鹽官人也遠清幹初從軍河西爲磧西支度判官時仇兼瓊鎮劍南辟爲從事欲以子妻之遠辭兼瓊怒積他事中傷貶爲高要尉後遇赦得還祿山之亂或薦遠素練

戎事明皇召見拜睢陽太守累加侍御史本州防禦使及  
賊將尹子奇攻圍遠與張巡姚閭嬰城拒守經年外救不  
至兵糧俱盡而城陷子琦執送洛陽害之

舊唐書  
本傳

安祿山

反巡起兵討賊河南節度使嗣虢王巨假巡先鋒巡至睢  
陽與遠合遠自以材不及巡請稟軍事而居其下專治軍  
糧戰具初睢陽穀六萬斛可支一歲而巨發其半饒濮陽  
濟陰遠固爭不聽至是食盡士多餓死巡出愛妾殺以大  
饗遠殺奴僮以哺卒至羅雀掘鼠煮鎧弩以食賊知外援  
絕圍益急士病不能戰城遂陷巡遇害子琦議生致一人  
慶緒所乃送遠洛陽至偃師不屈死詔贈遠荊州大都督

子攻婺州司馬立廟睢陽歲時致祭大中時圖巡遠像于

凌煙閣

唐書張巡傳

吳越國

水邱昭券臨安人初事吳越王佐爲內都監使佐欲誅程  
昭悅令昭券夕率甲士千人圍其第昭券曰昭悅有罪當  
顯戮不宜夜興兵未幾佐卒侖嗣與何承訓謀逐胡進思  
昭券諫不從謀洩難作昭券聞變入衛遂被害進思之妻  
曰他人猶可殺昭券君子也奈何害之進思後亦悔懼曰  
我不幸獨害君子

兩浙名賢錄

薛溫錢塘人以武勇爲親軍都頭天福十二年統軍使胡

進思旣廢忠遜王而迎忠懿王領兩軍事明年春遷忠遜  
王于衣錦軍私第進思日請圖害譬說百端不止忠懿王  
慮其有他變遣溫將親兵衛之且誡曰是行也委爾保全  
廢王若有非常處分皆非吾意當以死扞之進思果潛謀  
于溫溫拒而不許復夜使方安等二人逾垣入忠遜王第  
溫帥衆救之斃安等于庭中已而進思死忠遜王獲考終  
溫之力也溫累官鎮國都指揮使睦州刺史乾德三年捨  
地爲吉祥律寺未幾卒謚正顯

十國  
春秋

孫陟新城人仕錢氏爲尚書任常州防禦時寇盜充斥調  
兵督戰竟歿于陣呂城爲之立廟以卹禮歸葬墓在所居

太平鄉百丈村西復立廟於斯雙楓合抱至今猶存

成化舊志

宋

鞠嗣復宜和初知休寧縣方臘黨破縣欲逼使降面斬二士以怖之嗣復罵曰自古妖賊豈有長久者爾當去逆從順因我而歸朝官爵尚可得何爲脅我降後知必死屢言何不速殺我賊曰我縣人也明府宰邑有善政我不忍殺乃委之而去初嗣復聞難率吏民修城衆樂赴功守備畧就朝廷知之加直祕閣擢知睦州嘗爲賊所傷自力渡江乞師於宣撫使未行而卒

宋史本傳

按萬歷志鞠嗣復錢塘人

滕茂實字秀穎臨安人政和八年進士靖康元年以工部員外假工部侍郎副路允迪出使爲金人所留尼雅滿素聞茂實名乃遷之代州又自京師取其弟華實同居以慰其意欽宗自離都城舊臣無敢候問起居者茂實聞欽宗將至卽自爲哀辭且篆宋工部侍郎滕茂實墓九字取奉使黃幡裹之以授其友人朔寧府司理董詵欽宗及郊茂實迎謁拜伏號泣金人諭之曰國破主遷所以留公益將大用殂令易服茂實力拒不從請從舊主行金人不許憂憤成疾卒詵歸錄哀辭上其事紹興二年贈龍圖閣直學

士官其家三人

宋史本傳



唐恪字欽叟錢塘人以廕登第調郴尉大觀中牂牁內附召爲屯田員外郎持節招納敵始恫疑衷甲以迎恪盡去兵衛從數十卒單行敵望見懽呼投兵聽命以奉使稱職遷右司員外郎起居舍人迎遼使還言河北邊備弛廢宜及時治之中貴人中以他事降知梓州召拜戶部侍郎京師水暴至汴且溢付恪治之因上疏言水陰類也至犯宮闕天以陰盛之沴儆告陛下願垂意時事益儆天戒靖康初拜同知樞密院事洎金兵薄城下密言於帝曰宜舉景德故事留太子居守而西幸洛連據秦雍領天下親征以圖興復帝曰當以死守社稷何處爲相京城不守車駕至

金營恪曰計失矣旣而還宮恪請入覲果不可復幸恪曰  
一之爲甚其可再乎及金人逼百官立張邦昌令吳玠莫  
儔入城取推戴狀恪仰藥而死

宋史本傳

王稟海寧人當靖康之阨以孤軍守太原敵九攻而九拒  
之援兵不至矢盡糧絕招之卒不屈城陷與其子荀入告  
原廟抱太宗御容抗辭罵賊同赴汾水死建炎四年追封  
安化郡王謚忠壯荀贈右武大夫恩州刺史召其孫沆襲

封

萬歷舊志

楊由義字宜之父奉直建炎初以正將扈蹕寓杭金兵南  
下奉直禦敵由義將母及妹避地海昌金兵至母曰汝父

必死國難我當死婦節携女沉運河由義被執累日而逸  
領漕薦不第館於諸公之門吏部朱松嘗延請以誨其子  
熹後以父恩補右階監贍軍南庫隆興初盧仲賢北使辱  
命由義請行以閤門祇候密院幹官充奉使金國通問審  
議官金人折之使拜由義誓死不屈全節而歸後官至刑  
部侍郎卒朱熹欲銘其墓嘗曰忠義大節遠邇稱嘆會熹  
卒不果子九鼎咸淳志

楊九鼎字叔鎮以父由義任入官帥襄漕夔有善政復易  
利漕帥天漢敵劫大散關九鼎復之又復皂郊殺元帥完  
顏阿林後兵再至九鼎死守清野原除太府少卿總領蜀

賦時都統吳政戰沒麾下兵潰敵據漢中擣大安軍九鼎  
檄張威何進勦於三泉匹馬不返會蜀有新帥首招潰卒  
至雞公嶺復叛帥挾兵以遁有勸九鼎遁者答曰九鼎有  
職守不可去賊至遂遇害贈五官至朝議大夫官其子三

人咸淳志

史徽字洵美一云東美鹽官人勤苦力學登崇寧進士累  
遷戶部郎官出爲京西運判徽宗下詔罪已罷西城所督  
逋賦徽悉焚其租籍進右司郎中以疾致仕高宗卽位起  
爲司農少卿建炎三年扈駕至江口遂遇害贈左大中  
大夫右文殿修撰子龜年岑年皆至員外郎

萬歷舊志

姚興舊名叔興新城人有勇力善武藝爲統制官隸王權  
紹興三十一年完顏亮入寇兵至和州尉子橋興以一軍  
三千人力戰權置酒仙宗山上擁羣刀斧自衛殊不援興  
興殺賊數百以援不至而沒朝廷爲之立祠以表其忠寧  
宗朝追贈襲慶軍節度使開封府儀同三司

咸淳志

按宋史姚興傳興相州人隸都統王權麾下拒金兵尉  
子橋有李二者嘗有私恩于權因得出入軍中往來貿  
易竊權旗幟遺金人至是金人立權旗幟以誤興興赴  
之父子俱死贈容州觀察使官其後三人廟曰旌忠開  
禧元年謚忠毅咸淳志作新城人所錄事及贈官多互

互異咸淳志較宋史見聞較近今從之仍節錄宋史於後又舊志有唐琦傳餘杭志有盛新傳考宋史琦本衛士不言爲臨安人盛新載籍無考今不載

余古錢塘人光宗初罷拾遺補闕官近臣罕進言者紹熙二年五月古以布衣上書日間者側聞陛下宴遊無度聲樂不絕晝之不足繼之以夜宮女進獻不時伶人出入無節宦官侵奪權政隨加寵賜或至超遷內中宮殿已歷三朝奚用更建自古宦官敗國備載方冊今上而三省下而百司皆在此曹號令之下蓋自副將而至殿步帥各爲高價但如其價則有特除此爲害之大者良由公卿持祿保

位備員全身如漢之石慶唐之蘇味道滿朝皆小人也陛下果能以漢文帝爲法唐莊宗爲戒卽乞昭示詔旨嚴下約束除太常樂工立定員數凡俳優舐戲皆放爲民美女麗人自今無獻宴開以時酒進有數宦官不得干預朝政佞倖悉去忠良並進問安侍膳之餘宮庭燕閒講讀經史怡神養性享名教不窮之樂固嵩嶽無涯之壽豈不休哉帝震怒始議編管言者救之乃送秀州聽讀

萬歷舊志

趙卯發字漢卿昌化人卯一作昴以上合登第權通判池州元兵渡江守王起宗棄官去卯發攝州事繕壁聚糧爲守禦計元兵至都統張林屢諷之降卯發憤氣填膺瞋目

視林不能言林以兵出巡江陰降歸而陽助卯發爲守兵  
皆歸林卯發知不可守乃謂其妻雍氏曰城將破吾守臣  
不當去汝先出走雍氏曰君爲忠臣我獨不能爲忠臣婦  
乎兵薄城卯發晨起書几上曰君不可叛城不可降夫妻  
同死節義成雙與雍氏盛服同縊從容堂卯發始爲此堂  
名以從容及兵至領客堂中指所題扁曰古人慷慨殺身  
易從容就義難此殆其兆也卯發死元巴延具棺衾合葬  
於池上祭墓而去事聞贈文華閣待制諡文節雍氏贈順

義夫人錄二子爲京官

宋史  
新編

周宣字公猷錢塘人仕職方郎中德祐丙子元師次皋亭



宣上表請兵禦之時陳宜中主降議不報因自集族黨家  
丁爲報國計及元兵入臨安帝后遠狩宣乃北面泣拜率  
衆與戰身被刀矢負痛手格殺數十人隨遇害文天祥以  
詩哭之曰孤忠莫克挽頽軍一死名高百戰勲總恨權奸  
多異議難禁玉石不俱焚殺身却羨君先我徇國終當我  
繼君他日幽魂逢地下血應化碧氣凝雲

瞿佑撰  
周宜傳

馮驥字德父富陽人性至孝母病刲股和藥以進登景定  
進士調安吉武康簿有聲累遷大理丞時元兵下襄樊朝  
廷募豪傑爲戰守計驥被薦協張濡守獨松關元兵來攻  
殺其渠師元將益兵搥之濡遁驥與弟驥力戰死贈集賢

殿修撰

兩浙名賢錄

謝緒理宗皇后謝氏之族也世居邑之安溪孝女北鄉兒時浴於溪探水底得光明珠忽雲霧湧起有物蜿蜒作攫拏狀緒不爲動色及長善讀書爲會稽諸生彬彬稱儒者性剛決持論慷慨以椒戚故不復求仕進祖墓在金龍山遂築望雲亭而隱焉德祐二年帝北狩謝太皇太后以病請留元兵突入宮昇之而去緒大慟題詩二章與其徒訣曰生不能報國恩死當訴之上帝異日黃河水北流是吾效靈之證遂赴水死時茗水陡湧高丈餘緒尸立而逆流舉葬于金龍山祖墓之側

浙江明太祖戰于呂梁敵兵乘通志

流而下垂敗忽河水逆行空中聞人馬聲旌旗隱隱見金龍字遂得捷是夜太祖見夢儒巾深衣歷歷述生前事且曰兄弟四人緒居其季遂下詔封緒金龍四大王御筆親爲製贊天啟丙寅總督漕運蘇茂相疏請加封護國濟運金龍四大王凡舟行黃河者神應如響宿遷呂梁以及凡有漕運之地並立廟

國朝封顯佑通濟金龍四大王

特詔有司歲時致祭

錢塘縣志

葛天思字號及仕宋甫半載爲元兵所執勒降不從遂割其耳旋自縊無子妻妾二人協志守貞於家其里門在梅

東巷內名割耳巷又名葛巷歿後卽以住居爲廟

西湖志外紀

按成化志宋唐介入忠烈傳且稱爲餘杭人萬歷志及餘杭新舊兩志俱爲立傳今考宋史本傳介江陵人宋史記及東都事畧皆同成化志不知所據何書故不復載

元

郝世開字聞遠登州黃縣人襲授百戶戍海寧遂爲海寧人會張士誠陷浙西見元官從賊者切齒罵不絕口元亡不食而死其妻李氏以知禮聞

成化舊志

龔瑾海寧人曾任知州死元節葬安國寺後詩稿散逸不

傳止存蒼雪軒詩云月浸蒼龍骨雲分翡翠釵九疑愁正

斷清夢到書齋

浙江  
通志

杭州府志卷八十四

人物二 忠臣二

明

袁興錢塘衛千戶諸暨之戰有劉總管者爲賊所執興馳騎突入其陣賊衆披靡斬首數十級脫劉還及見主帥劉自以爲功興恬不之怪亦未嘗以語人人咸服其量軍士嘗乏食興解銀甲易粟活之及進攻雲南之龍海興從征慨然曰吾此行不生擒渠魁不返也遂力戰死詔遣使祭

贈明威將軍指揮僉事

萬歷舊志

按明代指揮千百戶多由世襲隸籍衛城故省志分載

入各府人物傳中其非世襲者仍載于名宦今從之

沈道南錢塘人建文時爲御史金川之變道南死之死時

戒子孫毋習舉子業

舊志

陳鏞字叔振錢塘人永樂進士選庶吉士授禮部祠祭司主事宣德二年征交南兵部尚書李慶贊軍務舉六卿之屬才且賢者自輔遂以鏞與儀制郎中豐城史安同行二人屢進忠益慶與主將初聽之屢勝繼不納竟至敗被執鏞顧安曰吾輩見危授命耳皆不屈死

成化舊志

夏誠字克誠錢塘人宣德乙酉舉人任沙縣教諭清慎有志操部使者上其賢擢監察御史正統中帝北征誠扈從

至土木乘輿陷敵中誠死于難後朝廷追錄死事忠勤官

其子繼先撫州知府

舊志

遂端仁和人西臯之孫登宣德五年進士官刑部員外郎  
勤於其職爲尚書所倚重英宗北征選從官端以才見選  
六師覆于土木從官死者不可勝數端殉節死景帝立旣  
贈卹諸大臣自給事中御史以下皆降勅褒美錄端子爲

國子生

武林道古錄

于謙字廷益錢塘人永樂十九年舉進士宣德初授御史  
出按江西雪冤囚數百人陝西諸處官校爲民害謙疏奏  
詔遣御史捕之帝知謙才可大任會增設各部右侍郎出



爲巡撫乃手書謙名授吏部遂超遷兵部右侍郎巡撫河南山西年僅三十三謙感帝知甫至官徧歷諸州縣察時所急事所宜興革卽具草言之一歲章數上當是時三楊在政府皆重謙所奏朝上夕報可以足得行其志正統中議事京師舉叅政王來孫原貞自代時王振用事勢張甚適有御史姓名類謙嘗忤振通政司李錫遂阿振指劾謙以久不遷怨望無人臣禮遂下法司論斬繫獄三月已而振知其誤怒解而山西河南吏民伏闕上書請留謙者以千數乃赦謙以大理少卿復往巡撫十三年以兵部左侍郎召明年額森入寇振挾英宗北征駕陷于土木京師大

震衆莫知所爲郕王監國命羣臣議戰守徐瑄言星象有變當南遷謙厲聲曰京師天下根本一動則大事去矣獨不見宋南渡事乎王是其言守議遂定遷本部尚書時王振雖歿而振黨馬順等猶恣于是給事中王竑廷擊順朝班大亂衛卒聲洶洶王懼欲起謙直前掖王止且啟王宣諭曰順罪當死勿論衆乃定謙退徐步出掖門吏部尚書王直最篤老執謙手歎曰國家正賴公耳今日雖百王直何能爲當是時朝廷皆倚重謙謙亦以身任其責上言扈駕文武臣有預軍事進止者當以失機論卽死不宜濫卹報許王旣卽大位入見泣奏曰敵得志要留大駕勢必輕

中國長驅而南請飭諸邊守臣協力防遏京營兵械且盡  
宜亟分道募民兵令工部繕器甲九門要地宜令都督孫  
鏜衛穎張軌張儀雷通分兵以守都御史楊善給事中王  
竑等參焉諸軍皆列營郭外而附郭居民皆徙入內通州  
積糧令官軍悉詣關支毋棄以資敵文臣如軒輊者宜用  
之巡撫武臣如石亨楊洪柳溥者宜用之將帥至于軍旅  
之事臣請身當之帝遂勅謙提督各營軍馬而是月額森  
已挾上皇破紫荊關直窺京師謙卽分遣諸將帥師二十  
二萬列陣九門自與石亨帥副總兵范廣武興陳德勝門  
外當額森身自督戰將士皆用命敵見官軍嚴陣待意少

沮叛閹喜寧乃嗾額森邀大臣迎駕索金帛復邀謙亨等  
出帝不許庚申敵數騎來窺德勝門謙亨先設伏空舍令  
數騎誘敵發火器擊之額森戰不利知終勿能得志又聞  
勤王師且至遂擁上皇由良鄉而西謙調諸將追擊至關  
而還論功加少保總督軍務固辭不允景泰元年敵攻圍  
萬全諸處謙請駐兵居庸敵來則出關勦殺退則就糧京  
師時有敵三人至大同欲朝廷遣使通好謙言前遣指揮  
季鐸岳謙而敵隨入寇通政王復趙榮不見上皇而還和  
不足恃明矣旣擒戮喜寧又計授王偉誘誅爲敵間者小  
田兒而特釋忠勇伯把台家以誘致之後竟得其力京師

稍解嚴於時八月上皇北狩且一年矣額森見中國無繫  
滋欲議和使頻至請歸上皇羣臣言宜遣使奉迎帝不懌  
曰朕本不欲登大位當時見推實出卿等謙從容曰天位  
已定寧復有他顧理當速奉迎耳萬一敵果懷詐我有辭  
矣帝顧而改容曰從汝從汝先後遣李實楊善往卒奉上  
皇歸謙力也先是瓦剌朝貢不過百人正統十三年至三  
千餘賞賚不厭其欲遂入寇及上皇歸復遣使三千來朝  
謙請列兵居庸關備不虞謙才略開敏方其初爲兵部也  
非獨瓦剌爲患浙江福建則有鄧茂七葉宗留餘黨廣東  
西則有黃蕭養及猺獞而湖廣貴州苗獠所至蜂起前後

征調皆謙獨運當軍書倥偬目視指屈口具章奏皆合機  
宜性忠孝忘身憂國自遭寇變常泣誓不與敵俱生帝嘗  
賜之第則辭帝欲用一人必訪謙謙亦竭誠無隱不避嫌  
怨諸不任職者咸忌嫉之又始終不主和議雖上皇以是  
得還然不免蓄怨徐瑄以議遷都故嘗切齒謙石亨總兵  
十營畏謙不得逞謙知其意力辭提督帝不允銜謙益深  
得勝之捷亨功不加謙而得世侯內媿疏薦謙子冕詔召  
赴京師謙辭不允冕至謙言國家多事臣子義不得顧私  
恩且亨位大將不聞舉一幽隱拔一行伍微賤以裨軍國  
獨薦臣子于公議得乎亨復大恚都督張軌以征苗失律

爲謙所劾與內侍曹吉祥等亦素憾謙景泰八年正月壬午亨等迎上皇復位宣諭朝臣畢卽執謙與大學士王文下獄誣謙與黃珌構邪議更立東宮又與太監王誠舒良張永王勤等謀迎立襄王子亨等主其議嗾言官上之都御史蕭惟禎定讞坐以謀逆處死文不勝誣辨之疾謙笑曰亨等意如是辨何益英宗尚猶豫曰謙實有功有貞進曰不殺于謙此舉爲無名英宗意遂決丁亥棄謙等市籍其家戍邊謙自入仕三遷至尚書值也先之變身任社稷安危嘗留宿直廬不還私第器具蕭然素病痰疾作景帝遣興安舒良更番往視還奏謙服用過薄詔計資令尚方

製賜至醢菜畢備帝又親幸萬歲山伐竹取漚賜之或言  
謙寵太重興安曰彼日夜分國憂不問家產卽彼去今朝  
廷何處更覓得此人及籍沒家無餘貲死之日陰霾四合  
朝野冤之皇太后聞謙死嗟悼累日英宗亦漸察其冤後  
有貞石亭相繼竄竊謙事自成化初冕赦歸上疏訟冤詔  
復官賜祭有云當國家之多難保社稷以無虞惟公道之  
獨持爲權奸所竝嫉在先帝已知其枉而朕心實憐其忠  
天下傳誦之宏治初加贈特進光祿大夫柱國太傅諡肅  
愍賜祠于其墓曰旌功萬歷中改贈忠肅後贈臨安伯冕  
字景瞻廕授副千戶坐戍龍門謙冤旣雪并復冕官自陳



不願武職改兵部員外郎居官有幹局累遷至應天府尹

致仕卒

明史本傳

沈敬字克欽錢塘人正統進士授兵軍主事轉郎中公忠正直爲權奸所惡景泰末謫戍遼陽成化改元詔復其官超拜河南叅政歲飢民流敬及時賑發全活甚衆計處榆林餽餉供用不乏轉廣西左布政使時田州黃明倡亂殺逐知府岑溥敬受督撫檄統衆征勦梟明父子擒斬無算觸險乘瘴深入賊巢中毒死朝廷官其子琦

浙江通志

呂忠字守誠其先廬州人以靖難勲世襲海寧所副千戶遂爲海寧人少美風儀業毛氏學爲博士弟子已而承世

官雍容故諸生也正德中姚源盜起攻鄉聚撼城邑三衛  
饒信千里繹騷撫臣徵諸道兵往征之檄下同事色變忠  
獨奮曰國家祿養累世用需一朝人私其身國何賴焉奮  
行至開化主帥調忠當賊衝壁忠曰擐甲執兵殪賊是求  
不當賊非夫也陣未集賊掩至忠挺身出戰發三矢殪二  
賊賊悉衆搏忠躍馬力戰陷溪涼中日莫援絕賊叢稍亟  
刺忠忠叱死怒罵不絕事聞贈忠正千戶世其官正德實錄  
林文貴台之黃巖騎兵也從戍海寧守禦正德中姚源盜  
起千戶呂忠統其屬會師征之文貴以騎士從時亂起倉  
猝當行者號慟振野或逃亡自賊殺文貴獨慨然長歌策

馬就隊一軍氣爲之振至開化壁華埠當賊衝賊據複嶺  
阻大溪叢薄彌望陣未集賊擁衆至忠戰死衆潰文貴厲  
聲曰將不負國吾屬豈忍負將進退等死耳衆義其言止  
戰者八十餘人文貴奮鎗洞賊胸賊憑怒戮力聚攻衆多  
戰死者得繫多伏泣祈生文貴僵立睽視賊咤發怒罵  
曰賊犯國法戕民命不旋踵齎粉矣賊怒則其足罣不已  
拔其舌猶噉嚼作晉狀至剖腹剗心乃已尸暴戰地有過  
之而失聲慟曰嗚呼此林文貴也好男子

海寧縣志

黃斌錢塘人世襲杭州右衛千戶正統十四年討處州賊

葉宗留殉難事聞朝廷錄其子孫改襲指揮

道古堂集

查約字原博海寧人宏治進士以南刑部郎山爲福建僉事治異等延平邵武暨福州軍相繼煽亂約以單車申諭衆咸戢服擢山東副使進福建左布政使歲浹饑下令諸司掾上納者悉出穀分貯諸倉備賑擢撫山東未行候官人林汝美以殺妻論死繫獄中又車二小劇盜也與汝美同繫二囚私賂守獄卒寬其械遂藏兵瓜中率衆破犂犴出殺令復破府中獄出衆囚相與趨南門將入海約自以故有德于閩出爲化誨言未脫口而刃已陷胸矣閩人立

祠祀之

閩書

姜楫海寧所千戶嘉靖三十二年征倭寇戰死海鹽城外

事聞陞其子本所副千戶

嘉靖海寧縣志

孫商偉富陽人嘉靖癸丑歲貢授福建寧德州教諭倭寇入學宮欲挾商偉行商偉曰我學官也職死學中去此一

步非死所矣遂死夫子像前

富陽縣志

孫繼魯字道甫嘉靖進士知淮安府織造中官過淮繼魯與之忤誣逮至京大學士夏言救免繼魯不謝言不悅進山西叅政數繩宗藩暨遷按察使宗藩百餘人擁馬發其裘敝衣外無長物乃載酒謝過二十六年擢右副都御史巡撫山西總督都御史翁萬達議撤山西內邊兵并力守大同外邊帝報可繼魯抗章爭兵部是繼魯言帝方倚萬

達怒繼魯騰私書引往事議上而夏言亦惡繼魯不爲地  
遂逮下詔獄疽發于項瘐死穆宗卽位贈兵部左侍郎謚

清愍

明史本傳

按明史作雲南右衛人萬歷錢塘志作錢塘人舊浙江  
通志有傳選舉卷亦列其名蓋錢塘乃繼魯本籍也聶  
氏萬歷錢塘志錄邑之忠節僅七人考核甚嚴且其時  
相去未遠當有所據今從之

吳懋宣杭州衛指揮萬表女夫也倭寇亂表聞變命懋宣  
將兵力焚其巢大破之懋宣乘勝逐寇倭僞遁爲所扼懋  
宣曰死吾職也恨不殲此賊耳重創而死

舊志

陳善道仁和人嘉靖丁未武進士擢杭州前衛指揮使以  
謀勇稱倭犯赭山善道率民兵三百徒步七十里與賊遇  
善道盛氣前射殺六人梟首一級賊大進所率皆烏合之  
衆一時瓦解善道獨戰于潭湖中蹶仆負傷揮刃猶中賊  
額遂洞脇而絕壯士潘賓王貴感憤亦赴圍死聞于朝特  
敕建祠祭祀如典

明浙江左布政使  
陳仕賢忠烈祠記

按同時殉倭寇難者杭州衛指揮吳懋宣冠帶總旗張  
儒海寧衛指揮滿朝采煉馬呈圖千戶王繼隆百戶康  
綬楊臣王相姚岑呂鳳姜楫海門衛指揮俞亨昌國衛  
百戶陳爵陳表吳懋宣姜楫已從舊志及舊海寧志錄

入滿朝馬呈圖采煉皆世襲海寧衛指揮例當作杭人而府縣志俱不錄省志沿嘉興府志之舊俱歸嘉郡張儒王繼隆康綬楊臣王相姚岑呂鳳俞亨陳爵陳表其籍無考既與善道同祀忠烈祠附識于此以俟博聞者又滿正係朝之父姚宏徐行健李元律亦世襲海寧衛皆當作杭郡人今並採錄

滿朝世襲海寧衛左所千戶父正正德中解軍械之京適劉六劉七亂山東遇之力戰賊數却行次滄州賊大至入見州守欲與嬰城守懦不能戰適胡世寧至滄遂協力禦之賊圍城八晝夜不能破尚書張縉疏上其功卽遷本衛



指揮僉事調戰桃源賊深入被害卒倪坦亦死之正贈明威將軍朝承襲稍遷指揮副使倭寇八大王擁衆踰梁庄朝率千戶王繼隆等追之賊設伏于古廟中突出被殺子上林輪刀如飛弓挽二石後逐賊于峽口戰死

浙江通志

馬呈圖世襲海寧衛指揮嘉靖三十一年倭犯海鹽呈圖奮勇攻擊生擒真倭二十四名次年倭首八大王等自青村登岸刼殺所犯官軍俱經摧敗呈圖提兵出城與戰軍潰直入賊圍身被三十餘創殞絕祀忠烈祠

浙江通志

承煉世襲海寧衛指揮嘉靖三十二年倭寇海鹽馬呈圖先馳煉往策應兵潰煉奮不顧身血戰而死祀忠烈祠

浙江通志

通志

姚宏世襲海寧衛指揮僉事嘉靖三十二年倭寇侵境督軍防勦屢獲戰功後與賊遇殺賊四十餘賊潰奔宏殺入賊巢被賊鏃死祀英烈祠

浙江通志

徐行健世襲海寧衛指揮嘉靖三十二年倭亂身經二十

餘戰斬倭首三百餘生擒十餘人後被殺祀英烈祠

浙江通志

李元律世襲海寧衛指揮嘉靖三十三年倭入寇奉調領兵防守富陽等處擒斬倭賊十一人復追戰于孟家堰陣

亡祀英烈祠

浙江通志

邵昇仁和人嘉靖武科官都指揮以倭變陣亡柘林三里

橋嘉靖三十七年總督胡宗憲請于朝建褒忠祠致祭

錢塘

縣志

按同時殉倭變者有左擊將軍宗禮指揮僉事姚泓贈  
指揮僉事于岳岳本諸生以兵死故贈指揮僉事同祀  
祠內靖海紀畧所載一時死難者有薛珙一作炯宋應蘭  
王鏜邵鼎劉大仲等其籍失載謹附名于此

姚來字舜延仁和人萬歷間累著軍功授惠州叅將泰昌  
元年秋山賊竊發惠州大震來孤軍深入賊砦戰沒奉旨

建祠惠州

舊浙江  
通志

許當辰字健菴餘杭人天啟間武進士授廣東旗鼓都司

征海寇劉香力戰沒于陣

浙江通志

陳其禮臨安人崇正二年九月任良鄉固節驛驛丞蒞任甫兩月遭兵與知縣黨還醇等抗守孤城以無援失陷不

屈致命崇祀名宦

良鄉名宦冊

祝淵字開美海寧人崇正六年舉于鄉自以年少學未充下帷棲鷹峯顛僧舍三年山僧罕見其面十五年冬會試入都適劉宗周諍姜垓熊開元削籍淵抗疏請收還成命復其故官帝得疏不懌停淵會試下禮官議淵故不識宗周既得命往謁宗周曰子爲此舉無所爲而爲之乎抑動於名心而爲之乎淵爽然避席曰先生名滿天下誠恥不

得列門牆耳願執贄爲弟子明年從宗周山陰禮官議上  
逮下詔獄詰主使姓名淵曰男兒死卽死耳何聽人指使  
爲移刑部進士共疏出淵未幾都城陷營死難太常少卿  
吳麟徵喪歸其柩詣南京刑部竟前獄尚書諭止之上疏  
請誅奸輔給事中疏薦淵可爲臺諫不許宗周罷官家居  
淵數往問學嘗有過入曲室長跪流涕自撾杭州失守淵  
方葬母趣竣工旣葬還家設祭卽投繯而死年三十五也  
踰二日宗周餓死

明史劉  
宗周傳

許文岐字我西仁和人崇正七年進士授南京兵部主事  
進員外郎職方郎中賊大擾江北佐尙書范景文治戎備

景文甚倚之遷黃州知府射殺賊前鋒一隻虎獄有重囚  
七人縱歸省尅期就獄皆如約十三年遷下江防道副使  
駐蘄州賊魁賀一龍蘭養成等萃蘄黃間文岐設備嚴賊  
黨張雄飛將南渡命游擊楊富焚其舟副將張一龍善馭  
兵文岐重之嘗共宿帳中軍中夜呼噪文岐曰此奸人乘  
夜思遁爾堅卧不出質明叛兵百餘奪門遁一龍追獲盡  
斬之一軍肅然十五年荆襄失守左良玉潰兵南下大掠  
文岐立馬江口迎之兵莫敢犯時警報日急人無固志會  
擢督糧參政文岐嘆曰吾爲天子守孤城三載矣分當死  
封疆雖危急奈何棄之遺妻奉母歸無何荆王府將校郝

承忠潛通張獻忠明年大舉兵來攻文岐發礮斃賊甚衆  
夜將半雪盈尺賊破西門入文岐巷戰雪愈甚礮不得發  
遂被執獻忠聞其名頗禮之文岐厲聲曰旣被執惟速死  
耳獻忠不殺繫之後營時舉人奚鼎鉉等數十人同繫文  
岐密謂曰觀賊老營多烏合此數萬卒皆被掠良民若告  
以大義同心協力賊可殲也於是陰相結期四月起事以  
柳圈爲信謀洩獻忠索之果得柳圈縛文岐斬之將死語  
人曰吾所以不死者志滅賊耳今事不成天也含笑而死

事聞贈太僕卿

明史本傳

蔡仁治字仲敷仁和人天啟甲子舉人先署諸暨縣教諭

歷官衡州府推官張獻忠犯楚仁洽不避難舟覆潘湖死

之武林耆舊集

崔文榮海寧衛人世指揮僉事舉武會試授南安守備崇  
正中臨藍盜起逼桂陽桂王告急文榮督所部會勦以功  
擢武昌叅將十六年四月張獻忠犯漢陽文榮渡江襲斬  
六百級已而城陷武昌震懼或議撤江上兵以守文榮曰  
守城不如守江圍風煤炭鴨蛋諸洲淺不及馬腹縱之飛  
渡坐守空城非策也當事不從賊果從圍風渡江陷武昌  
縣縣無人賊出營樊口文榮軍洪山寺扼之旣歛兵入城  
以他將代守賊全軍由鴨蛋洲畢渡抵洪山守將亦退入



城文榮以武勝門當賊衝偕故相賀逢聖協守賊攻之不能下監軍參政王揚基已擢僉都御史巡撫承天德安未聞命見勢急與推官傅上瑞詭言開門遁去先是楚王出資募兵應募者率潰卒及賊間謀至是開文昌保安二門納賊文榮方出關還闔城扉不及躍馬大呼殺三人賊攢槊刺之洞胸死

明史本傳

徐慶餘字兆穀新城人崇正元年以貢授四川珙縣知縣居官清慎吏民懷之會張獻忠陷蜀所過州縣望風披靡慶餘堅守孤城城陷不屈爲賊所害

舊浙江通志

按省志作餘慶舊省志及府志新城縣志俱作慶餘今

從之

成肇譽字玉純仁和人金衢嚴守備崇正十一年八月有  
龍賊之亂巡撫熊喬移駐金華檄肇譽勦捕冒雨行一日  
夜行三百餘里追賊至石練時援師遠至遂昌令糗糧不  
備肇譽與賊戰手殺三人銃斃三十餘人乃分兵張兩翼  
三路並進欲爲搗巢計林箐中伏賊四起肇譽氣益奮臂  
挾二鎗忽一鎗中其背亂刃交下遂遇害賊亦大創潛出  
浙境民感其義立祠祀之

仁和縣志

顧王家字翊明仁和人以鹽漕御史掾授河南汝州吏目  
臨汝當襄雒之衝王家兼倖事嚴保甲詰奸宄繕城堞調

糧餉賊畏之莫敢犯署郊城縣新令李貞佐至王家以秩滿遷去汝人伏御史臺留請攝監軍司馬崇正十三年逆聞攻汴不克遂犯郊城圍數重王家率敢死士嬰城固守矢竭城陷賊蜂擁入城褫貞佐衣冠倒懸大樹上將斷其舌磔焉王家瞋目曰賊無道至此恨不斬汝以啖語未畢刃亂下竟同日死

浙江通志

王家撫賊有功當遷汝人乞留之

助貞佐城陷王家大聲叱賊亂刃斫死遂盡殺郊人王家

子國誘賊發金墟墓間用巨石擊殺之

明史李貞佐傳

趙景和字萬育號凌霄天啟丁卯舉于鄉初署嘉禾學博癸未授瀘州守未抵任瀘爲獻賊破乙酉二月改任廣德

時征輸旁午又歲值荒旱下車卽嚴禁加派一意休息煮糜行賑民賴以生五月馬士英擁兵南竄稱太后來沿途殺掠道出廣德州民不自保景和檄父老告曰士英斃史公弼闔外且大臣不殉國奔不奉主上而奉太后太后處深宮人莫識是必孛孛鼠竄復矯旨脅獻庫帑萬金竭民膏是盜賊也頭可斷義不爲屈嚴城守以拒士英怒縱火攻城城陷景和坐堂皇士英突至叱曰爾小吏敢拒我殆反耶景和亦叱曰爾爲元臣不與史公戮力捍圉乃專報復朋黨門戶且納賄招權一旦敗壞棄君保家抱頭竄又輒冒稱太后而擁兵搖掠爾則反耳吾拒賊義也士英語

塞顧甲士兵之遂遇害百姓悲思爲建祠于州東崇祀名宦妾秦氏聞變升樓躍入胥井死子蒼壁方九歲僕錢義匿之得脫康熙壬戌成進士以捍夏逆亂擢監察御史

錢塘

縣志

翁之琪字元倩仁和人陝西按察使汝進孫也初爲郡諸生名珏三試不利乃投筆從戎中崇正十二年武榜上親簡將材奇之曰神骨森挺忠孝人也擢第一初任舟山守偏平海寇陳虎移守衢州會金陵失守慟哭自沉于蕪湖板子磯驚濤逆流屍不沒者三日收其骸如生

浙江通志

王寅錢塘人膂力絕人舉武鄉試以父征播功爲千戶崇

正中擢撫標守備見部卒脆弱詔曰曩威將軍練浙兵聞天下今若爾邪督教之卒始可用十年遷龍江都司未上調赴泗州護祖陵賊來犯寅日賊衆我寡及其未集可破也捲甲疾趨至盱眙斬其先鋒一人戰自午迄申賊來益衆與守備陳正亨陷陣死贈鎮國將軍都指揮僉事官一

子

明史蔣生徵傳

翁鴻業字一桓

浙江通志作一職

號水因錢塘人天啟甲子舉鄉

試第一乙丑成進士授禮部儀制司主事時魏忠賢柄國其子良棟知鴻業屬其鄉人邀致許以銓部謝不往由是沉淪祠部者四年莊烈帝卽位陞本部郎中轉廣東右叅

政分守嶺東會海寇挾倭侵軼嶺表鴻業修艤艫繕城郭  
嚴斥堠謹烽火徙民居詰奸宄倭聞有備不敢犯鴻業以  
內寇倚外寇而鵬張外寇憑內寇爲與穴不悉芟之將復  
蔓乃督將士勦之以丁祖父艱承重歸丁丑補山東督學  
右參政值羽書旁午鴻業按諸郡語諸生力學讀書當知  
世間有忠孝事絳帷蕭然飭巾待盡戊寅冬

王師抵山東倍道趨濟南時鴻業校士沂水奉檄署兵備篆遂  
單車馳百里赴省城濟南四門西北皆阻水南門道隘不  
容車馬東門平曠無險可阨城惡鴻業自請守東門登陴  
守陴者俱市人不任戰聞鼓角聲皆股栗自陞鴻業曰此

吾死所躬率家丁相守十晝夜乙卯正月二日大霧晝晦  
有持白旗以先登周麾而呼曰得西城矣鴻業分兵往禦  
俄而東門火紅旗卷旆以入衆潰城陷鴻業急下巷戰兵  
散馬逸劍着于頰傷左股遂投烈焰死屍骸俱燬莫可辯  
識其家人於積尸中得印燬一角識其文則所佩兵備道

篆也

吳農祥撰  
翁鴻業傳

按錢塘縣志山東破鴻業雜俘中以行號于市曰我提  
學道錢塘翁鴻業也我死期不負國千秋之後幸知此  
人遂自投于河而死吳農祥修郡志及錢塘志皆存其  
說旣訪得鴻業死事本末更爲作傳備錄于此



俞起蛟字芝雲錢塘人以明經起家拜魯憲王左相憲王薨肅王立入學行釋菜禮起蛟獻泮宮頌致規諷焉王欲廢世子起蛟察世子孝從容入告力持得免肅王薨世子立值歲大祲起蛟勸王賑饑自出相俸二千石繼之泰山盜李青山聚黨刦掠勢張甚起蛟與范黃門淑泰力戰俘其衆崇正十五年

王師攻兗城急王拊膺咨起蛟云先生何以教我起蛟正容對曰君死社稷臣死君義止此耳十二月兗州破魯王死起蛟率家屬二十三人以殉

舊志

陳潛夫字元倩錢塘人崇正九年舉于鄉廣交遊爲豪舉

好賊否人里中人惡之友人陸培兄弟爲文逐潛夫潛夫  
乃避居華亭十六年冬授開封推官開封被河灌城虛無  
人長吏寄居封邱有勸弗往者不聽會叛將陳永福率賊  
兵出山西其子德爲巡撫秦所式部將縛巡按蘇京去潛  
夫募兵請于所式及總兵卜從善許定國令共勦皆不肯  
行潛夫乃以十七年正月奉周王渡河居杞縣檄召旁近  
長吏設高皇帝位歃血誓固守賊所設僞官散布郡邑而  
開封東西諸土寨相攻殺無已潛夫聞西平寨副將劉洪  
起勇而好義屢殺賊有功往說之五月五日方誓師而都  
城失守報至乃慟哭令其下縞素起兵俘杞僞官遂渡河

大破賊將陳德于柳園擢監軍御史巡按河南潛夫乃入  
朝言山東河南地尺寸不可棄豪傑結寨引領待官軍誠  
分命藩鎮以一軍出潁壽一軍出淮徐則衆爭爲我用更  
頒爵賞計遠近畫城堡俾自守我屯銳師要害以策應之  
寬則耕屯急則乘塘汴梁一路臣聯絡素定旬日可集十  
餘萬人稍給糗糧臣當荷戈先驅諸藩鎮爲後勁河南五  
郡可盡復畫河爲固南連荆楚西控秦關北臨趙衛上之  
則恢復可望下之則江淮永安若不思外拒專事退守舉  
土地甲兵致之他人臣恐江淮亦未可保也當是時開封  
汝寧間列寨百數洪起最大南陽列寨數十蕭應訓最大

洛陽列寨亦數十李際遇最大諸寨中獨洪起欲效忠潛夫請予挂印爲將軍馬士英不聽用其姻婭越其杰巡撫河南潛夫自入覲卽馳赴河上所建白皆不用諸鎮兵無至者其冬應訓復南陽及泌陽舞陽桐栢遣子三傑獻提潛夫授告身飲之酒鼓吹旌旗前導出三傑喜過望往謁其杰其杰故爲尊嚴厲辭詰責詆爲賊三傑泣而出萌異心潛夫過諸寨饒吹送迎其杰過之諸寨閉門不出其杰譖潛夫于士英冬盡召潛夫還潛夫亦遭外艱歸明年三月給事中林有本疏劾御史彭遇凱並及潛夫士英獨令議潛夫罪未幾南都不守得脫歸聞魯王監國紹興渡江

往謁命復故官加太僕少卿監軍乃自募三百人列營江上尋進大理寺少卿兼御史江上師潰潛夫走至山陰化龍橋偕妻妾二孟氏同赴水死年三十七

明史本傳

陸培字鯉庭吉水令運昌之子運昌任永豐吉水多吏蹟培與兄圻弟堦並馳名一時崇正庚辰成進士授行人南還父卒培自留都奔赴長跪座前以手批頰頰盡腫齧其臂血淋漓聲淚俱下明亡入橫山桐塢嶺自經死

浙江通志培

少負俊才有文名行誼修謹客華亭嘗却奔女于室爲行人奉使事竣歸省南都既覆謀結壯士保鄉土俄聞潞王降索酒飲將自裁其妻晝夜守培乃給妻飽往拒戶自經

妻兄子破壁救之甦培大恨賦絕命詩二章上書其母以  
繩授二僕曰我爲烈士若輩宜相成坐方牀從容就縊死  
年二十九

明史陳  
潛夫傳

培仁和人子繁昭博學善屬文事母以

孝聞

仁和  
縣志

王道焜字昭平錢塘人父國柱舉人兗州同知道焜以天  
啟元年舉于鄉崇正時歷福寧州學正南平知縣以薦遷  
南雄同知會光澤寇發其父老言非道焜不能平撫按爲  
請詔改邵武同知知光澤縣事撫勅兼施境內底定莊烈  
帝破格求賢盡徵天下賢能吏撫按以道焜名聞吏部言  
同知不當與考選擬授職方主事道焜不平抗疏言御史

王孫蕃由知州改授知州同知秩皆五品知州可改同知  
獨不可改乎疏奏溫旨令候考方待命都城陷遂微服南  
還及杭州不守道煥慨然謂其子均曰世受國恩死固分  
也遂投繯死

明史朱  
大典傳

姚奇允字有僕錢塘人由進士授南海知縣地富饒多盜  
賊奇允絕苞苴力以弭盜爲事政聲大起入爲兵部主事  
改監察御史巡按廣東未任赴援死

明史郭  
維經傳

巡按廣東拜

疏辭曰兵戈擾攘自擇便安非人臣職也願盡力于疆場  
遂命以御史監贛州軍事卽日至贛與楊廷麟萬元吉連  
諸師爲水陸之勢奇允諭兵覈餉自挾佛郎機神臂弓率

家丁擊刺甲裳盡赤城破肅衣冠向闕拜已出轂繫命僕  
以縊僕泣不從奇允曰此猶良死爾不欲耶僕乃從之氣  
且絕喉間作聲曰死尚草草年四十有三贈兵部尚書謚  
忠敏

吳農祥撰  
姚奇允傳

奇允子端字以式亦以御史死柳州之難

柩與遺孤不得歸其友吳模求而得之歸葬武林

舊志

胡三極字贊皇昌化人崇正末賜特月出身授山西崞縣  
知縣以饒直忤當事調太平府經歷尋擢樂安縣知縣

大兵下江西城陷執之諭降至再三極曰吾今日得見先帝于  
地下吾志畢矣遂碎首以死時邑諸生方尚賓在幕以身  
殉焉樂安人感其忠義至今祀之

昌化縣志



按省志選舉卷三極作三傑

姜志宏字參宇昌化人以貢生授永康訓導尋陞西安教諭時進諸生講學明倫堂以忠孝相勉勵

大兵破衢州官屬悉遁去志宏獨集衆堅壘固守城陷不屈死

昌化縣志

茹文略字振先餘杭人驍勇善戰少從軍長興爲千夫長浙西旣降文略攜壯士十餘人入太湖從徐雲龍戰屢有功東浙遙授總兵每持長矛陷陣塘口八月之敗文略身被十餘創血盡而仆兵猶疑其佯死數刃之兵去稍甦捧其首而走之潯溪休野廟廟祝見而識之日子非茹其耶

持之而泣傳以良藥百日始愈丙戌正月又從軍於麻湖

力戰援絕而亡

餘杭縣志

都廷諫杭州人舊知縣

大兵至城破死之

明史朱繼祚傳

張起芬錢塘人姚志卓起兵以爲將乙未冬入海次崇明

被執至杭懸之樹間射殺之平生不讀書臨刑有詩云頭

能過鐵身方顯屍不封泥骨亦香

舊浙江通志

吳聞禮仁和人崇正癸未進士爲兵科給事中時分福州

延平邵武建寧爲上游四府擢聞禮右僉都御史巡撫其

地劾奏內臣戴炤奉使貪橫命逮問尋請守分水關閩中

三關天下阨險處也舊有守關兵閩恃以安及鄭芝龍有異志盡撤關上守卒聞禮遂不能獨支仙霞嶺破率鄉兵赴戰爲亂兵所殺

延平府志

俞元良字仲驤號穀濰海寧人崇正癸未進士沁州知州熊汝霖入海寧授以兵事後與其兄元禮同死之

就正編

周宗彛字五重海寧人崇禎己卯舉人少出吳太冲章正宸之門爲人有膽決尚氣節太冲正宸數稱之曰周生吾道千城也後殉難妻卜氏二妾朱衣紫衣及弟啟琦皆死

焉

浙江通志

按同時死者世職則有蔡國瑛朱大綱陸韜散見邑乘

無事跡可考附錄于此

諸復字子葭仁和庠生明亡詣櫟木營死之錢塘令顧咸

建備棺殮其屍葬秦亭山

浙江通志

方天眷字維嶽仁和庠生安貧力學避居石人塢授徒講

讀明亡自到死

浙江通志

傅巖字野倩號辛楣其先金華義烏人從其父母遊于杭

遂家錢塘崇正甲戌進士知徽州歙縣邑中皆峻山複嶺

多伏盜賊巖自督健兒掩捕劇賊五十餘人山賊潛約刼

獄巖先往搜牢賊聞令且至匿神廟潛窺令書生不甚畏

身匿廟中猶樹幟廟門巖控馬射其幟矢擊刃口錚然羣

駭曰令勇盡越戶去追獲十三人舉循良第一後以讒去官朱大典駐師金華疏嚴以御史監其軍

大兵平金華大典縋巖出城詣東甌求援爲追者所及被執不屈死子三齡文齡發齡熙皆有文名齡發齡熙抱父屍以死齡文奉母遷其柩歸杭後數年而卒

舊志

按傳巖省志作金華人舊志及錢塘志俱作錢塘人其家在紫陽山今從舊志

何鼎餘杭人一名文鼎性忠直宏治初爲長隨上疏請革傳奉官爲僭輩所忌壽寧侯張鶴齡兄弟出入宮禁嘗侍內庭宴帝如廁鶴齡倚酒戴帝冠鼎心怒他日鶴齡復窺

御帷鼎持大瓜欲擊之奏言二張大不敬無人臣禮皇后  
激帝怒下鼎錦衣獄問主使鼎曰有問爲誰曰孔子孟子  
也給事中龐泮御史吳山及尚書周經主事李昆等先後  
論救帝以后故俱不納后竟使太監李廣杖殺鼎帝追思  
之賜祭勒其文於碑

明史本傳

按明室宦官之橫甚于漢唐鼎獨能知大義殺身成仁  
能自拔于儔類者用錄附有明忠節之末

### 國朝

高咸臨字與侯仁和人讀書負氣節順治乙酉選貢任福  
建永安知縣地多寇盜咸臨下車撫循百姓遠近稍集丁

亥賊陷建寧擁衆犯永安咸臨防禦侄顯宗從弟其翰中表吳之璜先後捍賊死相拒五閱月而救不至糧絕隣邑盡陷咸臨奮勇數獲賊磔之城陷被獲脅降不屈死之

詔贈福建按察司僉事

賜祭葬廕一子鳳采

浙江通志

吳之璜字昆銘錢塘人順治初由副貢授漳平縣教諭將之任路經建寧山寇發永安知縣高咸臨與之璜中表昆弟乃招入城協力防禦出奇殺賊守重圍凡五月城陷與咸臨罵賊死

永安縣志

潘名世仁和人順治初爲保昌令愛民如子律已以廉李

成棟未叛之前檄民輸布千疋名世力爭成棟怒坐以他  
事戮于市臨刑顏色不變籍其家無長物百姓莫不流涕  
廣東名  
宦冊

吳夢鼎字仲鎮錢塘歲貢順治二年巡撫張存仁檄攝蘭  
谿縣事遇土寇不屈死之父敏惠捐建城東土壩居人呼  
爲吳公壩

錢塘縣志

錢法裕遼東籍仁和人順治三年任蒲州知州姜瓖之亂  
城陷被執不屈死事

聞贈布政司叅議

賜祭葬

山西通志



吳允焯字宏文仁和人順治三年由貢生隨征福建有功授壽寧縣知縣四年山寇四起乃招集義勇身先禦寇以衆寡不敵被執罵不絕口而死妻瞿氏常勸允焯盡忠勦寇勿以身家爲念聞難投繯死蒙

恩卹贈廕一子垣

福建通志

潘際昌仁和人順治三年隨征入閩知永清縣事適土寇嘯聚攻城際昌率民兵登陴守禦百餘日外援不至城陷

投井死

福建通志

胡萬鑑仁和人順治三年由貢生考授通判隨征入閩任永清縣學訓導土寇薄城萬鑑率諸生募民兵登陴捍禦

百餘日城陷被執不屈死之

福建通志

沈孚建錢塘人順治四年知政和縣山寇陷城被執罵不

絕口死之

福建通志

鄔象鼎字符九仁和人順治己丑進士備兵羅定時猺獞反側象鼎提師深入不數月而諸砦底定李定國破桂林逼羅定象鼎率長子元祿姪聯珠元珦伏弩四布砲石並發擒斬二千餘人師退既而敗兵旋集悉衆攻圍累月不解糧絕外援不至謂元祿曰死職吾事也爾無官守盍歸元祿泣願賫檄乞援隣封夜縋城出爲邏所得圍益急城陷縛元祿至前露刃脅降象鼎罵曰吾豈愛吾子以背吾

君耶元祿遂遇害象鼎被幽別室抗節不屈絕食七日死  
聯珠元珦并家屬五十七人咸殉難

詔贈光祿寺卿

諭祭葬廕子作霖入監

殉難錄

王起彪字虎子錢塘人順治丁亥進士戊子授德興知縣  
值江右金聲桓之叛起彪隨征南大將軍營半載己丑江  
西平將就任時饒郡巨寇雖滅而餘孽竄伏山谷者間竊  
發人多危之起彪曰吾奉命治縣綏靖吾職也敢以難辭  
六月入城八月隣邑曹董二賊擁衆猝至起彪率民兵守  
之寡不敵衆被執幽於天君廟脅之降不屈遂遇害雍正

六年

詔賜廟祀

江西通志

洪恩宣字成之臨安人邑諸生宋端明殿學士容夔裔也時山寇未靖知縣劉允燦奉檄勦撫恩宣請往至賊巢諭以大義不從遂遇害知縣高其成爲勒碑置田七畝給其子供祀

舊志

王萬鑑字人玉號靜延其先山陰人四世祖徙錢塘遂爲錢塘諸生順治戊子恩貢生選授福建布政司經歷攝將樂縣事土賊吳揚據險爲亂萬鑑下車立徵科法給帖招徠旬日而賊解散尋知江西萬年縣耿精忠叛饒廣二郡

爲內應萬鑑赴省請兵爲勦滅計遂恢復縣治陳兵以守  
招集流亡凡受僞劄者悉焚之令反側子自安由是被掠  
者歸命恐後持守久之復赴省請益兵甫出北門而賊猝  
至萬鑑力戰被砲死事

聞贈江西布政司叅議

賜祭葬廕一子國治

錢塘縣志

汪士岫錢塘諸生康熙甲寅耿精忠叛獻平閩策

和碩和親王留侍軍中授職同知乙卯夏恢復永康縉雲子  
女被掠者悲號載道士岫具啟于

王悉得遣歸是年九月

王偕往閩中爲逆黨所執罵賊而死崇祀鄉賢

鄉賢留祀冊

謝廷謨於潛人順治十三年歲貢授處州雲和訓導課文  
興行士風丕變康熙十三年耿精忠叛攻陷處州廷謨懷  
印入山號召義勇被執勒授偽銜不屈絕食而死

浙江通志

胡允發字爾玉世居阜亭知廣西昭平縣康熙乙卯孫延  
齡叛聞變卽授兵登堞時賊勢張甚居人多爲賊耳目俄  
而失其縣印知勢不可爲乃歎曰身不能與城俱存當與  
印俱亡朝服投署井中死長子士俊蔭授蒼梧縣典史痛  
其父死難願以武効改授武職以軍功歷陞貴州大定總

兵

城北雜記

趙燾字函暉仁和人順治丁亥武進士任象山右營叅將康熙乙卯由水路進勦耿精忠初至桃花洋與賊遇砲傷一足復進戰至貓頭洋賊斬僞都督周貴會風勢失利士卒殆盡燾猶手刃數人力竭被害事

聞贈副將

賜祭葬廕一子守備

仁和縣志

周文晔字穆仲海寧人順治丁亥進士選黔陽知縣黔陽地鄰五谿民徭雜處降將陳友龍鎮靖州背義復叛據縣之羅翁山屢出圍城文晔募兵固守來輒擊退之相持六旬後西出畧地卒遇賊金橋士卒不滿百文晔直前搏戰

一日夜矢盡援絕平明賊大合誘令倒戈復瞋目大呼罵  
不絕口遂與左右賓客等八十一人同時被害妻妾在縣  
署計聞一自經死一踴身入井死

道古堂集

傅國瑗仁和人筮仕雲南吳三桂叛殉節死弟國璘與妻  
周割股療其母之病忠孝相成遠近敬之

舊志

程光禪字奕先新安人籍錢唐順治辛卯舉于鄉生平孝  
友醇謹宰湖廣石門清廉惠愛一時翕然稱召杜吳三桂

叛殉難官署

兩浙鹽法志

查繼甲字英來海寧人由舉人授隆安知縣邑有湧泉溉  
田大旱泉閉兩年繼甲虔禱夜半聲如震雷泉暴湧民以



爲神報最當遷吳三桂叛誘降不應以事羈之遷於邑之

那重村事亟遂被害縣民數百人守柩不去子魏旭冒兵

刃赴粵扶櫬得歸葬

海寧縣志

陳英字載清錢塘人爲鳳山縣記室乾隆三十九年奸民

黃教不靖知縣往勦之英率僕余陞爲之運餉賊猝至被

執不屈死陞亦死英妻潘在杭聞之泣血死

閩省咨文

程蔭桂字燕山號臨川蘇州人占籍于杭爲仁和諸生乾

隆己卯舉順天鄉試丙戌挑發四川知大竹縣有聲將軍

溫福進勦金川蔭桂以才譖召詣幕府未幾木果木軍營

失事蔭桂被執不屈賊顧曰能教我然礮法且重用若蔭

桂曰可乃手自貯火藥於礮且慮礮力之不猛也更取他所藥併實之而給之曰須大力者擁之發乃遠意蓋在其酋也酋怵之令其下數人代礮發而數人殲焉其酋怒卽以其法試之蔭桂亦立時粉骨矣長子隨侍行間亦抗賊不屈死事

聞贈兵備道從祀昭忠祠蔭一子入監

張廷謨撰事略

汪時錢塘人四川潼川府通判乾隆三十八年六月進勦金川在木果木軍營陣亡事

聞贈道銜從祀昭忠祠蔭一子入監

縣冊

倪霖仁和人四川西昌縣縣丞乾隆三十八年六月進勦

金川在木果木軍營陣亡事

聞贈鑾儀衛經歷從祀昭忠祠蔭一子入監

縣册